

親征平定朔漠方略

親征平定朔漠方略卷之五

九月庚午朔。

命派京師大兵。及大同宣府等兵。備噶爾丹時折
卜尊丹巴庫圖克圖。遣使報稱。噶爾丹分兵
三路。沿途劫掠。約會於我邊。哨愛必汗喀喇
鄂博之地。侍郎溫達以

聞。

上諭尚書阿爾尼等曰。喀爾喀所告之言。雖未審虛實。而我邊塞不可不爲之防禦。應派京師八旗護軍每佐領七名。驍騎每佐領二名。前鋒二百名。火器營兵一千。子母礮八門。限五日內起程。再令大同宣府總兵官鮑敬藍理。各選精兵一千。親率而來。我軍俱應在歸化城駐備。其令議政王貝勒大臣議之。議曰。邊疆事關重大。應遵

上諭而行。此所派京師大兵。每翼應派都統二員。副都統四員。前鋒叅領一員。侍衛一員。每旗護軍叅領二員。驍騎叅領各一員。又總統火器營之都統。以及前鋒統領。現在隨

駕。應請

皇上簡用。此所派大兵。令何人總統督率而來。應用何項將軍印。伏候

睿裁議入。

諭曰。此係備兵。不必用將軍印。每翼置都統一員。
右翼著公蘇努率之。左翼著公華善率之。卽以
蘇努爲統帥。左翼著副都統邁圖納泰查木揚
楊代來。右翼著副都統希禪阿爾法牛鈕達爾
泰來。

壬申。

命都統公諾敏彭春等赴安親王岳樂軍前。京師及各路大兵暫停起行。

上諭兵部曰。前者侍郎溫達奏言噶爾丹分兵三路。追土謝圖汗。將近我喀倫。朕以邊疆事關重大。故頒諭旨。派京師大兵以備之。今聞噶爾丹於我朝所遣使臣待之有加禮。殊爲恭順。且又聞其遣使與我阿齊圖拜里等偕來請安。應將京

城大兵。暫且停其起程。仍令各爲預備候旨。大同宣府總兵官之兵。亦暫停起行。令其候旨。行在所有之兵。每佐領派護軍二名。前鋒派二百名。火器營兵全派。令赴安親王軍前。其存畱官兵。檢選肥壯馬匹。給發前去之兵。將青城運來之米。計口授之。此去之兵。著都統諾敏。彭春。護軍統領托倫。揮蘭。副都統康喀拉。尚圖。酌量派

發章京統率前往。

丁丑。土謝圖汗。折卜尊丹巴庫圖克圖率所屬請降。先是巴林烏朱穆秦嵩齊忒克西克騰科爾沁。阿霸哈納爾。蘇尼特。阿霸垓。扎魯特。歸化城土默特之各旗蒙古王台吉等。節次奏報喀爾喀額爾克吳巴什顧魯帶青額爾德尼阿海。懋都台吉。額爾克伊爾登達爾。

漢台吉。車卜登台吉。伊達木扎卜台吉。達賴
台吉。賓他海台吉。丹津台吉。達爾漢台吉。色
卜騰台吉。帶青台吉。額爾克綽克圖台吉。沙
克都爾台吉。米梯克額爾克帶青台吉。班第
帶青親達摩尼帶青台吉。巴忒馬巴圖爾台
吉。勞章巴圖爾台吉。他爾占達爾漢台吉。龔
格台吉。阿南達台吉。吳巴第台吉。朝罕台吉。

拉卜灘台吉。車林達什台吉。音扎納台吉。折
卜尊丹巴弟子西拉卜達什喇嘛。又墨爾根
帶青伊爾登卓力克圖台吉。扎卜青台吉等
爲首。各率屬下人衆奔入喀倫。請降。陸續具
報。

上遣官往

諭。准令來降之喀爾喀。在喀倫以內游牧。不許妄

行盜竊。仍嚴飭內地蒙古各禁止屬下。不許
侵凌盜竊。至是土謝圖汗率其弟西地西里
巴圖魯台吉等奏言。謹奏

皇帝睿覽。諸凡情事。曾兩次遣人入奏。俱蒙

俞旨鑒納。不勝懼悚。謹率自古以來。歷世所轄左
翼。及相附之右翼諾顏等。同請歸依

皇上帝。伏乞大沛

弘恩勸救。臣等朔日吉旦遣奏。又設站侍郎溫達
報曰。折卜尊丹巴庫圖克圖遣使來告曰。向

蒙

皇上鴻恩。勵以勤修功德。欽遵

諭旨。禮誦靡懈。不意厄魯特來焚燬廟宇。棄擲經

典。今未知再能仰副

皇上聖旨否。久欲入覲

天朝。自念生於荒徼。言詞粗陋。恐不能奏對。是以
未果。我諸弟子衆多。願依

皇上神聖太平之治。以副夙望。仰乞

聖恩俯恤。賜以水草善地。且望重建前廟。又左右兩
翼諸台吉。皆奉我爲師。言庫圖克圖欲入。則
我等願從。又沿喀倫一帶阿霸哈納爾諸台
吉。亦欲從入。因謂之曰。我荷

皇恩深重。我意已確然不移。汝等果欲誠心歸附。各
隨汝等之意。我不便爲汝等代奏也。理藩院
據報以
聞。

旨下議政王貝勒大臣集議。議曰。厄魯特。喀爾喀。
向來歸化。職貢有年。今交惡相攻。喀爾喀國
破。土謝圖汗。折卜尊丹巴庫圖克圖等。仰瞻

皇上萬邦一體同在覆育。誠心請降。應受而養之。爲之安插。俾其得所。卽令尚書阿爾尼前往喀倫。面見折卜尊丹巴庫圖克圖。土謝圖汗等。備宣

諭旨。覆奏之日。再請

上裁。得

旨如所議。阿爾尼瀕行。

上諭之曰。喀爾喀等雜處我邊汛內外。應嚴禁屬下。不許劫奪。盜竊爲亂。如有違犯。照內地律例正法。至放火小偷。亦照我例從重治罪。其令喀爾喀該管屬下。嚴加曉諭。

甲申。學士拜里等携噶爾丹疏歸覆

命。拜里。阿齊圖等奉使至噶爾丹所。噶爾丹遇之殊爲恭順。以入邊貿易事。託阿齊圖等奏言。

頃奉

明旨。限貿易人。毋得過二百名。我兄弟台吉等。不知其故。以爲出自我意。不容彼貿易。皆與我不和。乞爲代奏。照常進貢貿易。并遣使根敦。哈什哈等。與阿齊圖偕來。請

安入貢。疏曰。頃接到使臣賁來

勅諭禮物。不勝懼悚。喀爾喀土謝圖汗。折卜尊丹